

Z A K O N

**O ZAŠTITI SVJEDOKA POD PRIJETNJOM I UGROŽENIH
SVJEDOKA BRČKO DISTRIKTA
BOSNE I HERCEGOVINE**

U skladu s članom 23 Statuta Brčko Distrikta Bosne i Hercegovine, Skupština Brčko Distrikta Bosne i Hercegovine na 65. sjednici, održanoj 28. maja 2003. godine, usvaja

Z A K O N
O ZAŠTITI SVJEDOKA POD PRIJETNJOM I UGROŽENIH SVJEDOKA
BRČKO DISTRIKTA BOSNE I HERCEGOVINE

GLAVA I
OPĆE ODREDBE

Član 1.

Svrha Zakona

Ovim zakonom se uređuju mjere koje osiguravaju zaštitu svjedoka pod prijetnjom i ugroženih svjedoka u krivičnim postupcima koje vode Osnovni sud i Apelacioni sud Brčko Distrikta Bosne i Hercegovine (u daljem tekstu: Sud) ili Javni tužilac Brčko Distrikta Bosne i Hercegovine (u daljem tekstu: Tužitelj).

Član 2.

Definicije

Izrazi koji se koriste u ovom Zakonu imaju značenje prema Zakonu o krivičnom postupku Brčko Distrikta Bosne i Hercegovine (u daljem tekstu: ZKP Brčko Distrikta BiH) i Krivičnom zakonu Brčko Distrikta Bosne i Hercegovine, osim ako nije drugačije predviđeno ovim Zakonom.

Član 3.

Svjedoci pod prijetnjom i ugroženi svjedoci

- (1) Svjedok pod prijetnjom je onaj svjedok čija je lična sigurnost ili sigurnost njegove porodice dovedena u opasnost zbog njegovog učešća u postupku, kao rezultat prijetnji, zastrašivanja ili sličnih radnji koje su vezane za njegovo svjedočenje.
- (2) Porodica iz stava 1. ovog člana podrazumijeva osobe koje mogu odbiti svjedočenje prema ZKP-u Brčko Distrikta BiH.
- (3) Ugroženi svjedok je onaj svjedok koji je ozbiljno fizički ili psihički traumatizovan okolnostima pod kojima je izvršeno krivično djelo ili koji pati

od ozbiljnih psihičkih poremećaja koji ga čine izuzetno osjetljivim, odnosno dijete i maloljetnik.

- (4) Zaštićeni svjedok je onaj svjedok koji se saslušava prema odredbama člana 14. do 23. ovog Zakona.

Član 4.

Primjena mjera zaštite svjedoka

Sud može odrediti one mjere zaštite svjedoka koje smatra potrebnim, a koje su predviđene ovim Zakonom, uključujući primjenu više mjera istovremeno. Prilikom odlučivanja koja će mjera zaštite svjedoka biti primjenjena, Sud neće odrediti primjenu teže mjere ako se ista svrha može postići primjenom blaže mjere.

Član 5.

Obavještavanje svjedoka

- (1) Sud, Tužitelj i drugi organi koji učestvuju u postupku će po službenoj dužnosti poučiti svjedoka pod prijetnjom ili ugroženog svjedoka o mjerama zaštite svjedoka predviđenim ovim Zakonom.
- (2) Svjedok pod prijetnjom i ugroženi svjedok ima pravo na pravnu pomoć u skladu sa zakonom.

GLAVA II MJERE ZAŠTITE SVJEDOKA

Član 6.

Osiguranje psihološke, socijalne i stručne pomoći

Tužitelj u toku istrage, a nakon podizanja optužnice Sud, obavještava organ nadležan za pitanja socijalnog staranja o uključenju ugroženog svjedoka u postupak i omogućava pružanje pomoći tog organa kao i psihološku potporu svjedoku, uključujući prisustvo odgovarajućih stručnih osoba prilikom ispitivanja ili saslušanja.

Član 7.

Red izvođenja dokaza na glavnom pretresu

U toku glavnog pretresa, Sud može saslušati svjedoke pod prijetnjom i ugrožene svjedoke u najskorije moguće vrijeme i ima mogućnost da sasluša

te svjedoke na glavnom pretresu drugačijim redosljedom od onog koji je propisan u ZKP-u Brčko Distrikta BiH.

Član 8.

Ispitivanje

- (1) Sudija, odnosno predsjednik vijeća će u odgovarajućoj mjeri kontrolirati način ispitivanja svjedoka kada se ispituje ugroženi svjedok, posebno u cilju zaštite svjedoka od uznemiravanja i zbunjivanja.
- (2) U izuzetnim okolnostima, Sud može, uz suglasnost stranaka i branitelja, saslušati ugroženog svjedoka tako što će mu direktno postavljati pitanja u ime stranaka i branitelja.

Član 9.

Svjedočenje putem tehničkih uređaja za prijenos slike i zvuka

Pri odlučivanju da li postoje opravdani razlozi da se svjedok ispita putem tehničkih uređaja za prijenos slike i zvuka na način na koji stranke i branitelj mogu postavljati pitanja, a da ne budu prisutni u istoj prostoriji sa svjedokom, takođe će se uzeti u obzir potreba da se osigura zaštita svjedoku pod prijetnjom i ugroženog svjedoka.

Član 10.

Udaljavanje optuženog

- (1) Kada postoji opravdana bojazan da će prisustvo optuženog uticati na sposobnost svjedoka da svjedoči potpuno i tačno, Sud može, po službenoj dužnosti ili po prijedlogu stranaka ili branitelja, a nakon saslušanja protivne stranke i branitelja, narediti da optuženi bude udaljen iz sudnice.
- (2) Optuženom će biti omogućeno da prati svjedočenje putem tehničkih uređaja za prijenos slike i zvuka ili će svjedočenje biti zabilježeno i predočeno optuženom.
- (3) Branitelj će biti prisutan na saslušanju. Nakon što se optuženom predoči svjedočenje svjedoka, a prije nego se svjedok otpusti, branitelju i optuženom omogućit će se da se konsultuju.
- (4) Na rješenje iz stava 1. ovog člana stranke i branitelj mogu izjaviti žalbu. Vijeće Apelacionog suda razmatra žalbu u roku od 72 sata nakon prijema žalbe.

Član 11.

Izuzeci od direktnog izvođenja dokaza

Pri odlučivanju da li se zapisnici o iskazima datim u istrazi mogu pročitati i koristiti kao dokaz na glavnom pretresu, Sud će također uzeti u obzir potrebu da se osigura zaštita svjedoka pod prijetnjom koji bi se mogao izložiti, ili njegova porodica, velikoj ličnoj opasnosti, odnosno zaštita ugroženog svjedoka koji bi se mogao izložiti značajnoj duševnoj boli ako bi se pojavio na glavnom pretresu.

Član 12.

Ograničenje prava optuženog i njegovog branitelja da pregleda spise i dokumentaciju

- (1) U izuzetnim okolnostima, ako bi otkrivanje nekih ili svih ličnih podataka svjedoka ili drugih detalja doprinijelo otkrivanju identiteta svjedoka i ozbiljno dovelo u opasnost svjedoka pod prijetnjom, sudija za prethodni postupak može, po prijedlogu Tužitelja, odrediti da neki ili svi lični podaci svjedoka, ostanu povjerljivi nakon podizanja optužnice.
- (2) Tužitelj odmah obavještava optuženog i njegovog branitelja o podnošenju prijedloga iz stava 1. ovog člana.
- (3) Ako je moguće, sudija za prethodni postupak će saslušati optuženog i njegovog branitelja prije nego što donese rješenje iz stava 1. ovog člana. Sudija za prethodni postupak mora donijeti rješenje u roku od 72 sata nakon prijema prijedloga.
- (4) Protiv rješenja iz stava 1. ovog člana žalba nije dopuštena.
- (5) Ako sudija za prethodni postupak nije bio u mogućnosti da sasluša optuženog i njegovog branitelja prije donošenja rješenja iz stava 1. ovog člana, Sud će ih saslušati odmah po primitku optužnice.
- (6) Sud može ukinuti rješenje iz stava 1. ovog člana po službenoj dužnosti ili po prijedlogu optuženoga ili njegovog branitelja.
- (7) Sud ukida rješenje iz stava 1. ovog člana na prijedlog Tužitelja.
- (8) Sud će uvijek voditi računa o potrebi da se, čim bude moguće, otkriju podaci na koje se rješenje iz stava 1. ovog člana odnosi. Otkrit će se

dovoljno detalja kako bi se odbrana pripremila za ispitivanje svjedoka. Podaci moraju biti otkriveni najkasnije u vrijeme kada svjedok daje iskaz na glavnom pretresu.

Član 13.

Dodatne mjere za osiguravanje anonimnosti svjedoka

- (1) U izuzetnim okolnostima, kada postoji opravdana bojazan da će se ozbiljno ugroziti lična sigurnost svjedoka ili njegove porodice ako se neki ili svi lični podaci svjedoka objelodane i da će ta opasnost postojati i nakon davanja iskaza svjedoka, Sud može po službenoj dužnosti ili po prijedlogu stranaka ili branitelja odlučiti da lični podaci svjedoka ostanu povjerljivi u trajanju za koje se odredi da je potrebno, a najviše 30 godina nakon što odluka postane pravomoćna.
- (2) Sud može nakon saslušanja stranaka i branitelja odlučiti da se anonimnost svjedoka sačuva tako što će se dozvoliti svjedoku da svjedoči iza paravana ili koristi elektronski uređaj za promjenu glasa ili slike svjedoka, ili i slike i glasa koristeći se tehničkim uređajima za prijenos slike i zvuka.
- (3) Sud može, po službenoj dužnosti ili po prijedlogu stranaka ili branitelja, u bilo kojem trenutku ukinuti rješenje iz stava 1. ovog člana.

Član 14.

Saslušanje zaštićenog svjedoka

U izuzetnim okolnostima, kada postoji očigledna opasnost za ličnu sigurnost svjedoka ili njegove porodice i opasnost je tako ozbiljna da postoje opravdani razlozi za vjerovanje da nije moguće da se ta opasnost umanju nakon što je svjedok dao iskaz, ili je vjerovatno da će se opasnost povećati zbog davanja iskaza, Sud može saslušati zaštićenog svjedoka u skladu sa članom 15. do 23. ovog Zakona.

Član 15.

Prijedlog za saslušanje zaštićenog svjedoka

- (1) Prijedlog za saslušanje zaštićenog svjedoka može podnijeti:
 - a) sudija odnosno predsjednik ili član vijeća;
 - b) Tužitelj; ili
 - c) osumnjičeni odnosno optuženi ili njegov branitelj.

(2) Prijedlog mora sadržavati:

- a) podatke koji utvrđuju identitet svjedoka i postupak u kojem će svjedok dati iskaz;
- b) činjenice koje ukazuju da je lična sigurnost svjedoka ili njegove porodice ugrožena zbog njegovog učešća u postupku; i
- c) okolnosti o kojima svjedok treba biti ispitan.

(3) Ako prijedlog podnese Tužitelj ili osumnjičeni, odnosno optuženi ili njegov branitelj, prijedlog mora biti podnešen Sudu u zapečaćenoj koverti, a na vanjskoj strani koverte mora jasno biti naznačeno da se radi o prijedlogu za saslušanje zaštićenog svjedoka iz člana 14. do 23. ovog Zakona.

Član 16.

Utvrđivanje potrebe a saslušanjem

(1) Po primitku prijedloga za saslušanje zaštićenog svjedoka, vijeće Osnovnog suda sastavljeno od trojice sudija će bez odlaganja, a najkasnije 15 dana od dana prijema prijedloga, utvrditi da li je takvo saslušanje opravdano.

(2) Sud zasniva svoju odluku na:

- a) činjenicama u prijedlogu za saslušanje zaštićenog svjedoka; i
- b) dokumentaciji o krivičnom predmetu koja je dostavljena vijeću.

Član 17.

Žalba na odluku vijeća

(1) Protiv odluke iz člana 16. ovog Zakona dopuštena je žalba.

(2) Vijeće Apelacionog suda razmatra žalbu iz stava 1. ovog člana bez odlaganja i donosi odluku najkasnije u roku od 15 dana od dana prijema žalbe.

Član 18.

Zakazivanje saslušanja

Nakon pravomoćnosti odluke da se održi saslušanje zaštićenog svjedoka, predsjednik vijeća zakazuje datum, vrijeme i mjesto saslušanja.

Član 19.

Saslušanje

- (1) Saslušanje zaštićenog svjedoka provodi vijeće iz stava 1. člana 16. ovog Zakona u skladu sa odredbama ZKP-a Brčko Distrikta BiH koje se odnose na saslušanje svjedoka, osim ako to nije drugačije određeno ovim Zakonom.
- (2) Svjedok će biti poučen da:
 - a) se sasluškava kao zaštićeni svjedok;
 - b) se njegov identitet neće otkriti nikome sem članovima vijeća i zapisničaru vijeća;
 - c) se neće lično pojaviti pred vijećem na bilo kojem saslušanju osim na saslušanju zaštićenog svjedoka; i
 - d) nije obavezan odgovarati na pitanja koja mogu ukazati na njegov identitet ili identitet članova njegove porodice.
- (3) Vijeće će detaljno saslušati svjedoka o okolnostima koje je naveo podnosilac prijedloga i o svim drugim okolnostima koje vijeće smatra neophodnim.

Član 20.

Zapisnik

- (1) Zapisnik sa saslušanja zaštićenog svjedoka ne sadržava podatke o identitetu zaštićenog svjedoka.
- (2) U zapisniku se koristi pseudonim za svjedoka koji određuje vijeće, a koji će se koristiti tokom krivičnog postupka i u odlukama Suda.

- (3) Članovi vijeća i zapisničar vijeća potpisuju zapisnik sa saslušanja zaštićenog svjedoka.
- (4) Sud preduzima mjere da se osigura povjerljivost zapisnika tako što:
- a) čuva zapisnik na sigurnom mjestu i odvojeno od ostale dokumentacije krivičnog spisa;
 - b) vraća zapisnik na sigurno mjesto nakon njegovog korištenja na odgovarajućem saslušanju u krivičnom postupku i nakon što odluka postane pravomoćna; i
 - c) obezbjeđuje dugoročno arhiviranje zapisnika na način koji dozvoljava pristup tom dokumentu samo predsjedniku krivičnog odjeljenja u trajanju za koje se odredi da je potrebno, a najviše 30 godina nakon što odluka postane pravomoćna.

Član 21.

Korištenje zapisanog iskaza

- (1) Na glavnom pretresu krivičnog predmeta, Sud će narediti da se iskaz zaštićenog svjedoka pročita naglas iz zapisnika sa saslušanja zaštićenog svjedoka.
- (2) Sudiji odnosno vijeću nije potrebna saglasnost stranaka u postupku da naredi da se iskaz pročita naglas.
- (3) Sudija odnosno vijeće može odustati od čitanja iskaza naglas uz saglasnost Tužitelja, optuženog i njegovog branitelja.
- (4) Svjedok se ne može pozvati da dadne iskaz na bilo kojem saslušanju sem na saslušanju zaštićenog svjedoka.

Član 22.

Dodatna pitanja

- (1) Sud može po službenoj dužnosti ili po prijedlogu Tužitelja ili optuženog ili njegovog branitelja odlučiti da se zaštićenom svjedoku postave dodatna pitanja:
 - a) da se pojašni ranije dat iskaz; ili
 - b) vezana za podatke koji nisu bili obuhvaćeni ranije datim iskazom, a koji su od značaja za predmet.

- (2) Vijeće će održati dodatno saslušanje zaštićenog svjedoka na kojem će svjedoku biti postavljena dodatna pitanja, a odgovori će se zabilježiti i pročitati naglas na način iz člana 21. ovog Zakona.

Član 23.

Neophodnost drugih dokaza za donošenje presude

Sud ne može zasnivati presudu isključivo na osnovu dokaza iz člana 11. ili člana 14. do 22. ovog Zakona.

GLAVA III OSTALE ODREDBE

Član 24.

Povjerljivost

- (1) Podaci vezani za mjere zaštite svjedoka do kojih dođe osoba na službenoj dužnosti u toku obavljanja dužnosti vezanih za mjere zaštite svjedoka, predstavljaju službenu tajnu.
- (2) Sud ili Tužitelj će upozoriti osobe prisutne na saslušanju, ili osobe koje saznaju takve povjerljive podatke u toku svojih službenih ili profesionalnih dužnosti, da je neovlašteno otkrivanje takvih podataka krivično djelo.
- (3) Od osobe koja vrši službenu dužnost vezanu za mjere zaštite svjedoka i koja sazna podatke iz stava 1. ovog člana se ne može tražiti, ni u kojem postupku, ni pred kojim sudom, tribunalom ili istražnom komisijom bilo kojeg oblika, da dostavi bilo koji dokument ili otkrije ili ispriča bilo kakav sadržaj vezan za te podatke.

Član 25.

Poslovnik o radu

Sud će usvojiti poslovnik o radu koji osigurava odgovarajuće korištenje mjera zaštite svjedoka predviđenih ovim Zakonom i koji garantuje da će se svjedocima dati drugi adekvatni vidovi zaštite ili zbrinjavanja kao što je to predviđeno odgovarajućim Zakonima Brčko Distrikta Bosne i Hercegovine.

**GLAVA IV
PRIJELAZNE I ZAVRŠNE ODREDBE**

Član 26.

Primjena na krivične postupke u toku

Ovaj Zakon se shodno primjenjuje i u onim krivičnim postupcima koji su u toku u vrijeme stupanja na snagu ovog Zakona.

Član 27.

Stupanje na snagu ovog Zakona

Ovaj Zakon stupa na snagu 1 jula 2003. godine i objavit će se u «Službenom glasniku Brčko Distrikta BiH».

Босна и Херцеговина
БРЧКО ДИСТРИКТ
БОСНЕ И ХЕРЦЕГОВИНЕ
СКУПШТИНА БРЧКО ДИСТРИКТА

Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA

Broj: 0-02-022-155/03
Brčko, 28. maj 2003. godine

PREDSJEDNIK
SKUPŠTINE BRČKO DISTRIKTA

Mirsad Đapo, dipl. pravnik

U skladu s članom 22 Statuta Brčko distrikta BiH ("Službeni glasnik Brčko distrikta BiH" broj 3/07), Skupština Brčko distrikta BiH, na 43. sjednici održanoj 28. februara 2007. godine, usvaja

Z A K O N
o izmjenama i dopunama
Zakona o zaštiti svjedoka pod prijetnjom
i ugroženih svjedoka u Brčko distriktu BiH

Član 1

U članu 1, riječi: «javni tužilac Brčko distrikta BiH», zamjenjuju se riječima: **«Javno tužilaštvo Brčko distrikta BiH»**.

Član 2

Član 2 mijenja se i glasi:

«Značenje pojmova»:

- (1) U smislu ovog zakona, pojam porodice odnosi se na lica kojima je dozvoljeno da odbiju da svjedoče u skladu s odredbama člana 83 Zakona o krivičnom postupku Brčko distrikta BiH (u daljnjem tekstu: ZKPBD BiH);
- (2) Ostali izrazi koji se koriste u ovom zakonu imaju značenje u skladu sa ZKP-om BDBiH, Krivičnim zakonom BDBiH i Zakonom o sudovima Brčko distrikta BiH, osim ako nije drugačije predviđeno ovim zakonom».

Član 3

U članu 3, stavu 1, iza riječi «vezane za njegovo svjedočenje», tačka se zamjenjuje zarezom i dodaje tekst: **«ili svjedok koji smatra da postoji razumna osnova za bojazan da bi takva opasnost vjerovatno nastala kao posljedica njegovog svjedočenja»**.

U članu 3, stav 2 se briše.

Stavovi 3 i 4 postaju stavovi 2 i 3.

Član 4

U članu 5, stav 2 mijenja se i glasi:

«Svjedok pod prijetnjom i ugroženi svjedok ima pravo na pravnu pomoć i pomoć i podršku organa za socijalno staranje, u skladu sa zakonom».

Član 5

U glavi II ovog zakona prije člana 6 dodaje se novi član **5-a koji glasi:**

«Mjere zaštite primjenjuju se samo uz saglasnost svjedoka».

Član 6

U članu 6, iza riječi «sud», dodaju se riječi: **«pod uslovom da postoji saglasnost svjedoka i bez objavljivanja bilo kakvih ličnih podataka o svjedoku».**

U ostalom dijelu tekst ostaje neizmijenjen.

Član 7

U članu 8, stavu 2, iza riječi «izuzetnim okolnostima» dodaje se tekst: **«ako sud utvrdi da je to u najboljem interesu svjedoka».**

Član 8

U članu 10, stavu 2, ispred riječi «optuženom će biti omogućeno» dodaju se riječi: **«ako je udaljen iz sudnice».**

Član 9

- (1) U članu 12, stavu 3, riječi: «donese rješenje iz stava 1», zamjenjuje se riječima: **«izda rješenje iz stava 1, a riječi: «mora donijeti rješenje u roku od 72 sata» zamjenjuju se riječima: «mora izdati rješenje u roku od 72 sata».**
- (2) U članu 12, stavu 8, na početku teksta iza riječi «sud će», dodaju se riječi: **«u svim fazama postupka».**

Član 10

- (1) Naslov člana 13 mijenja se i glasi: **«Dodatne mjere kojima se obezbjeđuje neotkrivanje identiteta svjedoka».**
- (2) U članu 13, stavu 2, riječi: «odlučiti da se anonimnost svjedoka sačuva tako što će se dozvoliti svjedoku» zamjenjuju se riječima: **«odlučiti da identitet svjedoka ne bude otkriven tako što će se dozvoliti svjedoku».**

Član 11

- (1) U članu 15, stav 1 mijenja se i glasi: **«Sud može utvrditi je li opravdano saslušati zaštićenog svjedoka, bilo po službenoj dužnosti, bilo na zahtjev tužioca, osumnjičenog, optuženog ili njegovog advokata».**

- (2) U članu 15, stavu 3, riječi: «ako prijedlog podnese tužilac ili osumnjičeni, odnosno optuženi ili njegov branilac», **brišu se.**
- (3) U članu 15, dodaju se novi stavovi 4 i 5 koji glase:

«(4) Koverta s prijedlogom za saslušanje zaštićenog svjedoka, bez odgađanja, dostavlja se predsjedniku suda. Predsjednik suda obavezan je prijedlog proslijediti odgovarajućem pretresnom vijeću ili ako do tada još nije potvrđena optužnica, izdati nalog kojim se imenuju predsjednik i dva dodatna člana vijeća, koji će raspravljati o tom pitanju.

(5) Sud može da pozove lice koje je podnijelo prijedlog da dodatno pojasni činjenice od značaja za prijedlog».

Član 12

- (1) U članu 16, stavu 1, riječi: «vijeće Osnovnog suda sastavljeno od trojice sudija», zamjenjuju se riječju: «**sud**».
- (2) U istom članu, iza stava 2, dodaje se novi stav 3 koji glasi:
- (3) **O odluci suda u skladu sa stavom 1 ovog člana, obavještavaju se sve stranke bez odgađanja, a najkasnije tri dana od dana donošenja odluke o prijedlogu. Navedeno obavještavanje vrši se pismenim putem, ali ne sadrži ime ili bilo koju drugu informaciju koja bi ukazivala na identitet svjedoka na kojeg se prijedlog odnosi.**

Član 13

- (1) U naslovu člana 17 **briše se riječ «vijeća».**
- (2) U članu 17, u stavu 1, iza riječi «žalba», tačka se zamjenjuje zarezom i dodaje tekst: «**a žalba se mora podnijeti u pisanom obliku, u roku od sedam dana od dana donošenja odluke suda, a u skladu s postupkom iz člana 15 stava 3 ovog zakona.**».
- (3) U članu 17, stavu 2, prije riječi «vijeće Apelacionog suda» dodaje se riječ: «**nadležno.**».

Član 14

- (1) U članu 18, riječi: «predsjednik vijeća» zamjenjuju se riječju: «**sud**», a iza riječi «mjesto saslušanja» dodaju se riječi: «**čim to bude praktično izvodljivo.**».

Član 15

- (1) U članu 19, stavu 1, riječi: «vijeće iz stava 1 člana 16 ovog zakona» zamjenjuju se riječju: «**sud**».
- (2) U istom članu, stavu 2, tački b, riječi: «članovima vijeća i zapisničaru vijeća» zamjenjuju se riječima: «**članovima suda i operateru - asistentu suda.**».
- (3) U istom članu, stavu 2, tački c, ispred riječi: «neće se lično pojaviti» dodaju se riječi: «**ako je dobio status zaštićenog svjedoka,**» a riječ: «vijeće» zamjenjuje se riječju: «**sudom.**».
- (4) U istom članu, stavu 2, tački d, riječi: «nije obavezan odgovarati» zamjenjuju se riječima: «**ne može biti prisiljen da odgovara.**».
- (5) U istom članu, stavu 3, riječ: «vijeće» zamjenjuje se riječju: «**sud.**».

Član 16

- (1) U članu 20, stavovima 2 i 3, riječ: «vijeće» zamjenjuje se riječju: «**sud**».
- (2) U članu 20, stavu 4, riječi «preuzima mjere da se», **brišu se**.

Član 17

- (1) Naslov člana 21 zamjenjuje se i glasi: «**Korištenje iskaza zaštićenog svjedoka**».
- (2) U istom članu, u stavovima 2 i 3, riječi: «sudija, odnosno vijeće» zamjenjuju se riječju: «**sud**».
- (3) U istom članu, stavu 4, iza riječi: «saslušanju zaštićenog svjedoka» dodaju se riječi: «**u skladu s odredbama člana 19 stava 2 tačke c ovog zakona**».

Član 18

U članu 22 stav 2 mijenja se i glasi: «**Sud će održati dodatno saslušanje zaštićenog svjedoka, na način propisan članovima 18-20 ovog zakona u mjeri potrebnoj za potpuno i pravilno utvrđivanje činjenica. Pitanja i odgovori bilježe se i čitaju glasno na način propisan u članu 21 ovog zakona**».

Član 19

Član 23 mijenja se i glasi:

«**Sud ne može da zasnuje osuđujuću presudu isključivo ili u odlučujućoj mjeri na dokazima pribavljenim u skladu s članom 11 ili članovima 14-22 ovog zakona**».

Član 20

Iza člana 24 dodaje se novi član 24-a koji glasi:

Član 24-a

«**Opće odredbe vezane za otkrivanje informacija, propisane aktom o slobodi informisanja BiH, ne primjenjuju se na obradu ličnih podataka svjedoka u skladu s ovim zakonom**».

Član 21

Ovaj zakon stupa na snagu 8. (osmog) dana od dana objavljivanja u «Službenom glasniku Brčko distrikta BiH».

Broj:0-02-022-25/07

Brčko, 28. februar 2007. godine

PREDSJEDNIK
SKUPŠTINE BRČKO DISTRIKTA BiH

Prof. dr. Milan Tomić, s.r.

ZAKON
O IZMJENAMA I DOPUNAMA ZAKONA O ZAŠTITI SVJEDOKA POD
PRIJETNJOM I UGROŽENIH SVJEDOKA BRČKO DISTRIKTA

Član 1

U Zakonu o izmjenama i dopunama Zakona o zaštiti svjedoka pod prijetnjom i ugroženih svjedoka Brčko distrikta ("Službeni glasnik Brčko distrikta BiH", brojevi: 10/03 i 8/07) u članu 1 riječi: "Javno tužilaštvo Brčko distrikta" zamjenjuju se riječima: "Tužilaštvo Brčko distrikta".

Član 2

Ovaj zakon stupa na snagu 8. (osmog) dana od dana objavljivanja u "Službenom glasniku Brčko distrikta BiH".